

## Die vertauschte Bogantsche

Sie ware Kumrade, seit se mitnaner in die Proffessionalschul gang sin. Mer kann saan, lang, lang is es her. Dernoh han se in Temeschwar in derselwi Fabrik gearweit, in drei Schichte. Han sich ufmol derzu entschloss e Owetsschul newebei zu bsuche un han sogar mit Brio 12 Klasse abschloss un es Bak ghol. In der Zwischenzeit is vill Wasser dorch die Bega geloff. Jeder vun de zwaa hat studiert, gheirat, Kiner kriet un is uf e anres Arweitsplatz kumm. De Hans war in Arad Lehrer, de Matz in Temeschwar Inschinier. Sie han oft mitnaner telefoniert, doch es sin guti Johre vergang, bis mol e Gelegenheit war, sich naner zu treffe. De Matz hat in Arad zu tun ghat un de Hans bsucht.

Natierlich is iwer allerhand verzählt gin. Vor em Nachtesse han die zwaa de Raki verkoscht un dernoh e Liter Wein getrunck. Ufmol schaut de Matz uf die Uhr, springt uf un ruft: „Ich muss doch de letschte Zug erwische! Ansunschte han ich de greeschte Potka derhem“! Weils grad Winter war hat de Matz sei Bunde angezoo un is in e Phaar Bogantsche gschluppt, hat schnell e Taxi bstellt un is zur Bahn gfahr. In allerletschter Minut is er in de Zug gstie, es war schun noh Mitternacht, wie er dann in Temeschwar ankumm is. Also wieder in e Taxi un je hem.

Es Leni hat gewart uf ne, sie han noch e gudi Weil mitnaner verzählt un sin schlofe gang. Am anre Morjet, es war grad Sunntach, hat de Matz sich noh em Fruhstuck gedenkt, er muss sei Bogantsche sauwer mache. Wie er die in die Hand holt, gsieht er, dass er jo e fremdes Phaar Schuh hat. „Leni, hascht dann nit bemerkt heit Nacht, dass ich nit in meine Schuh hemkumm sin?“ Es Leni kummt neugierich bei un lacht: „Die sin zwar braun wie dei Bogantsche, doch sie sin nit ausgepelzt inewenzich. Hascht dann nix bemerkt vun Arad bis Temeschwar?“

„Meiner Seel nee! Ich sin vum Hans ins Taxi, dann in de Zug, wieder ins Taxi. Also ich han nit gespiert, dass es nit mei Schuh sin“.

Inzwischen hat ach de Hans des Iwel bemerkt. Sie han telefoniert un ausgemacht, wie se die Winterschuh jetz wieder auswechsle selle. Was dann ach de Samschtach druf in Temeschwar passiert is.

## Treppauf, treppab

Seider ich im Jahr 1964 uf Temeschwar kumm sin, han ich iwerall mit villi Treppe zu tun ghat. Im Lenalyzeum war mei Klassenzimmer ufm zweite Stock. Selmols war des jo eenerlei, ich war jung. Dann han ich gheirat un mir sin in die Blockwohnung uf de zehnte Stock kumm. Weil oft de Strom ausgang un de Lift nit gang is, han ich genau gewisst, wievill Treppe ich hoch oder nuner gehn muss. Ach des war selmols, saa mer mol Sport betreiwe.

Dann sin ich später zur Zeitung kumm, die Reimlichkeite ware ach owe im Stock. Am Anfang hat mer des nix ausgemacht. Doch mit der Zeit is mer de Ochtum ausgang, weil ich jo phaarmol am Tach nuf un nuner han misse.

Un jetzer, wu ich mich schun meh am Geganders nufschleppe muss, han mer unser Schlofzimmer bei de Kiner, wann mer dort uf Bsuch sin, im Dachgeschoss. Also scheen staat: Treppauf, treppab.... Solang ich noch kann is jo alles in schenschter Ordnung.